

- 1^r Das ich alleyn zyttlichs betracht
- 2^r Vnd vff das ewig hab keyn acht
- 3^r Das schafft / eyn aff hatt mich gemacht

Kap. 43



verachtung ewiger freyt

- 1 Eyn narr ist / wer berümet sich
- 2 Das er gott ließ syn hymelrich
- 3 Begerend / das er leben mag
- 4 In narrheyt / biß an jungsten tag

5 Vnd blyben möcht eyn güt gesell
 6 Er far joch dann / war gott hyn well
 7 Ach narr / wer doch vff erd eyn freyd
 8 Die wert eyn tag vnd nacht on leyd
 9 Das sie nit wurd verbittert dir
 10 So möcht ich gdencken doch jn mir
 11 Das du möchtest han ettwas vrsach
 12 Die doch wer narrecht / klein vnd schwach
 13 Dann der hatt worlich dorecht glust
 14 Wån hie die leng zû leben lust
 15 Do nüt ist dann das jamertal
 16 Kurtz freüd / voll leid steckt vberal
 17 Gedencken soll man wol do by
 18 Das hie keyn bliblich wesen sy
 19 Die wile wir farent allesant
 20 Von hynnan / jn eyn frömdes landt
 21 Vil sint vorhyn / wir kumen noch
 22 Wir müssen gott an schowen doch
 23 Es sy zû freüden oder stroff /
 24 Dar vmb sag an du dorechts schoff
 25 Ob grösser narr ye kem vff erdt
 26 Dann der / wer solliches mit dir gerdt
 27 Du *wünschest* von got scheyden dich
 28 Vnd würst dich scheyden ewigklich
 29 Eyn hunig tröpflin dir gefalt
 30 Vnd wurst dort gall han / tusent falt
 31 Eyn ougenblick / all freüd hie sint /
 32 Dort ewig freüd vnd pyn man findt
 33 Welch fräuelich triben sollch wort
 34 Den fällt jr anschlag / hie vnd dort

27 *wünschest*] *wünfcheft* GW5041 GW5046 GW5047